

小

腆

紀

傳

小腆紀傳卷第四十四

前翰林院檢討加詹事府贊善銜六合徐肅謨

列傳第三十七

陳子龍

沈廷揚 沈始元等

林汝翥

林奎  
陳世亨

葉子器

張煌言 羅子木等

陳子龍字臥子華亭人幼穎異善今古文偕郡人立幾社海內宗仰之與江右艾南英爭詆不相下登崇禎丁丑進士授惠州推官改紹興折節下士東陽諸生許都者副使達道孫也見天下將亂陰以兵法部勒賓客子弟思得一當同郡舉人徐孚遠見而奇之謂子龍曰許都國士朝廷方破格求才倘假以職隱然干城也子龍因與都遊數薦之上官不能用

東陽令姚孫斐桐城人以備亂斂士民資坐都萬金不得適義烏奸人假中貴名招兵事發令謂都結黨謀逆持之急時都有母喪會葬山中者數千人令疑爲變遽告監司王雄遣使收捕都黨執令痛笞之旬日間聚眾數萬下東陽義烏浦江遂逼郡城巡按御史左光先急調撫標兵行勦民各保寨拒敵官兵大敗雄欲撫之語子龍曰賊聚糧據險官兵不能仰攻非久持不克我兵萬人止五日糧奈何子龍曰都舊識也請往察之單騎入都營諭令歸降待以不死乃挾都見雄復挾之徇山中散遣其眾都乃以二百人隨子龍來降光先竟殺都等六十餘人於江潯子龍救之不得大恨以招撫功擢兵科給事中子龍深痛負都不赴也南都立以原官召用

子龍疏言自古中興之主如少康周宣皆躬親武事三代之  
後漢之光武唐之肅宗莫不身先士卒故能先復舊物從未  
有深居法宮履安處順而可以戡定禍亂者臣瞻拜孝陵依  
依北望不知十二陵尙能無恙否而先帝先后之梓宮何在  
興言及此陛下當嘗膽臥薪宵衣旰食羣工庶尹亦宜砥礪  
鋒鏑奮發意志以報讎雪恥是務竊聞山東河北義旂雲集  
拭目以望南師朝廷晏然置之度外何以收三齊抗手之雄  
慰趙魏悲歌之士乎臣恐天下豪傑知朝廷不足恃不折而  
歸賊則羣然有自王之心矣伏望陛下速幸京營大閱復弭  
節江潁大集舟師分命武臣一至蕪湖一至京口以視險要  
固根本令一軍由歸亳以入汝雒次潼關一軍由襄鄧以攻

武關出廣漢巴蜀之甲燕晉之師則用之爲奇兵爲聲援逆賊投首可計日待矣又言臣入國門再旬矣人情泄沓無異昇平清歌漏舟之中痛飲焚屋之內臣不知其所終矣其始皆起姑息一二武臣以至凡百政令皆因循遵養臣甚爲之寒心也時廷臣懲劉孔昭殿上相爭事無敢言者太僕少卿馬紹愉陛見言及陳新甲主款事上曰如此新甲當恤羣下愕然相顧少詹事陳盟曰可因命予卹且追罪嘗劾新甲者子龍偕同官李清交章力諫之乃獲已未幾請召還故尙書鄭三俊御史易應昌房可壯等並可之又上防守要策言防江之計莫過水師海舟之設更不容緩請專委兵部主事何剛訓練又疏備邊三害請收復襄陽皆當時至計而莫之能

用也尋戶部尙書張有譽以內批陞用子龍疏言計臣清端敏練百僚所服但古制爵人於朝與眾共之墨敕斜封覆轍可鑒萬一異日有姦邪乘間左右先容銓司不及議宰輔不及知而竟以內降出之臣等不爭則倖門日開爭之則已有前例立國之始願陛下慎持之也尋命采選淑女中官子龍言中使四出有女之家黃紙帖額閭井騷然明旨未經有司殊非法紀又收選內員慮市井無賴自宮希進先朝若瑾若賢皆壯而自宮者也皆不聽明年二月以時不可爲乞養去南都不守閏六月十日松江兵起子龍設太祖像誓眾稱監軍左給事中沈猶龍稱總督兵部尙書邀致水師總兵黃蜚吳淞副總兵吳志葵故巡撫王家瑞蘇松兵備李向中等爲

守城計閩中授子龍兵部右侍郎左都御史浙東授兵部尙書節制七省漕務八月三日松江破子龍以祖母在匿深山吳勝兆事獄詞連子龍子龍亡命同夏之旭奔嘉定告急於侯岐曾匿其僕劉馴家已遷崑山顧天達所當事跡至嘉定執岐曾別遣兵圍天達家獲子龍鎖舟中泊跨塘橋下乘間入水死時丁亥四月二十四日也猶戮屍弟子王雲收而葬之雲字勝時時稱義士我

朝賜子龍專諡曰忠裕之旭等自有傳

沈廷揚字季明崇明人爲人多智好談經濟崇禎中由國子生爲內閣中書舍人時山東運道多梗議復海運廷揚疏言其便輯海運書五卷因戶部尙書倪元璐以呈請以廟灣六

船試之不一月廷揚上謁元瑤驚曰我已言公去矣奈何尙在廷揚笑曰糧至矣元瑤卽入奏帝大喜授戶部郎中往登州與巡撫徐人龍計海運事向來甯遠軍餉用天津船自登州候東南風轉至天津又候西南風轉至甯遠廷揚請從登州直達甯遠省費甚多尋命赴淮安專督海運事宜累加光祿寺少卿

王師之下松山也繞出經略洪承疇後糧道斷絕帝召廷揚議請行乃由天津口經山海關左達鴨綠江半月抵松山軍中呼萬歲比還而後餉不繼城遂陷甲申闖賊犯京師廷揚以部檄馳至淮上借漕糧二十萬甫發運而凶問至南都立命以原官督餉饋江北諸軍疏言臣厯年海運有舟百艘皆



高大完好中可容兵三百人水手皆熟知水道便捷善鬪今  
海運已停如招集水師加以簡練則二萬人之眾足成一軍  
亦長江之衛也疏上不報時廷臣有請由海道出師北伐者  
歎曰誠使是策得用頗爲前軍已皆不行但命運米十萬餉  
吳三桂軍劉澤清在淮上欲得其舟廷揚曰須俟朝命澤清  
縱兵奪之時漕撫田仰爲馬士英私人一切軍務置不問淮  
上瓦解遂率部下歸崇明

大兵下江南廷揚航海入浙魯王監國加戶部侍郎兼右僉  
都御史總督浙直令由海道窺三吳時田仰爲相忌之乃至  
舟山依黃斌卿隆武帝在閩授官亦如之時諸軍無餉競起  
剽掠浙東之張國柱陳梧爲尤甚乃密謂斌卿曰師以恢復

爲名今若此則賊已將軍其戒之斌卿曰公言固是然將何以足食廷揚因爲之定履畝勸輸法於是軍士不復敢掠松江提督吳勝兆之將舉事也送款舟山斌卿猶豫不欲應廷揚曰事機之來間不容髮奈何坐失之定西侯張名振慨然請行邀之爲導乃謂之曰兵至必以崇明爲駐劄地禁打糧然後可名振許之至崇明食盡名振違約登岸掠食舟泊鹿苑五更颶風大作自相擊軍士溺死者過半

大兵逆岸上合呼薙髮者不死名振與監軍都御史張煌言馮京第雜降卒中逸去廷揚歎曰風波如此其天意邪吾當以一死報國然死此無名乃呼謂遊騎曰吾都御史也可解吾之南京時丁亥四月十四日也至蘇我巡撫諭之降不可

國事之不濟命也至江甯洪承疇以松山事與有舊使人說之曰公但薙髮當大用問誰使汝來曰經略廷揚曰經略死松山之難先帝賜祭十三壇建祠都下安得尙有其人遂與部下贊畫職方主事沈始元總兵官蔡德遊擊蔡耀戴啓施榮劉金城翁彪朱斌林樹守備畢從義陳邦定及從子甲十三人同日被刑死其親兵六百人斬於蘇之婁門無一降者計至舟山哭聲如雷就地立祠祀焉贈戶部尙書我朝賜通諡忠節

林汝翥字大蕨福州舉人知沛縣天啓時緝妖人王普光黨有功擢御史巡視京城有民人曹大妻與富家奴角口服毒死內奄冒進傳國興以眾掠富家用大錐刺其主刑官不問

汝翥捕得進進懼劾請受杖杖之五十國興怒邀汝翥於道罵不已復杖之如進魏忠賢聞之大怒立傳旨收汝翥廷杖先數日羣奄毆殺萬燦汝翥懼乃逸至遵化巡撫及同列交章論救不得解卒杖之削籍歸一時強直之名大著南都授雲南臨沅道旋坐貶魯監國徵爲兵部右侍郎總督義師與族人林一攻福清奎字子野崇禎癸未進士知海甯縣邑有妖人以劍術惑眾能緣壁走伏水中一二日不出聚黨千人聞都城陷將舉事奎捕殺之杭州不守兵士乘亂鼓譟乞餉奎罪其首者而如所請以城孤不能存棄官歸隆武帝召之黃道周督師命以戶部員外郎司餉改御史往諭浙西行至贛州召還授吏部文選司員外郎請託遂絕從扈汀州倉卒

不能及號慟返山中丁亥七月魯監國航海至長垣郡邑起兵應之奎別其父曰兒當死久矣作令城不守當死扈駕事不終當死若再苟延是以不令之名貽父母羞乃易履負戈雜旅徒中攻福清身被數創猶勒兵戰中流矢死汝翥被執服金屑死奎之友人葉子器者掌營中記室事被執使作書招奎子器揮絕命詞與之亦被殺我

朝賜汝翥通諡忠節奎烈愍

陳世亨不詳何處人官中書舍人丁亥秋魯監國入閩世亨以一旅復瑞安援兵莫繼被執不屈死

張煌言字元箸號蒼水鄞縣人崇禎壬午舉於鄉父圭章刑部員外郎母趙感異夢生生而神骨清邁豪邁不羈能文章

善騎射帝以天下多故令諸生於試經義後試射矢三發三中常感憤國事願請纓及錢肅樂集師檄會諸鄉老煌言獨先至肅樂且喜且泣卽遣之天台迎魯王授行人紹興監國賜進士加翰林院編修入典制誥出籌軍旅閩中頒詔之役自請爲使釋二國嫌旣歸累有建白丙戌師潰泛海將之舟山道逢富平將軍張名振偕扈監國入閩招討朱成功不奉命乃勸名振還石浦與戚鹵侯黃斌卿爲犄角加右僉都御史斌卿恆以降乩炫才能一日賓僚咸集乩降思澁煌言微笑之斌卿問故煌言曰僕亦有仙可不速而至斌卿固請煌言請出十題限十韻援筆立就一座歎服斌卿呼爲張大仙云明年松江提督吳勝兆請以所部來歸斌卿不樂從乃與

故都御史沈廷揚御史馮京第共說名振應之遂監其軍以  
行至崇明颶風覆舟廷揚死名振墮水諸軍皆潰有百夫長  
者導煌言走間道復還入海時肅樂已奉監國出師於閩浙  
東山寨羣起遙應煌言復集義旅劄上虞之平岡諸山寨咸  
事鈔掠獨大蘭王翊東山李長祥與煌言而三履畝勸稅相  
安無擾己丑從居健跳庚寅斌卿誅監國入舟山召所部入  
衛加兵部右侍郎辛卯降將田雄官浙江提督以書來招峻  
拒之是秋舟山城破扈監國再入閩次鷺門時朱成功縱橫  
海上軍獨強遙奉永曆帝爲號於監國則修寓公之敬而已  
惟煌言與名振以軍爲衛成功因之有加禮煌言亦極推其  
忠嘗曰招討始終爲唐眞純臣也成功亦曰侍郎始終爲魯

與吾豈異趣哉癸巳冬復間行入吳淞尋招軍天台明年軍吳淞以上游有夙約會名振之師入長江趨丹陽掠丹徒登金山望石頭城遙祭孝陵烽火連江江南震動而上游失期不至左次崇明甲午再入江掠瓜洲儀真蒲燕子磯而所期終不至遂乘流東返舟山是役也故南都誠意伯劉孔昭亦以軍會或謂煌言宜絕之煌言曰孔昭罪誠與馬阮等然馬阮再賣浙東而孔昭以操江親兵棲遲海上者累年則其心尙可原疾之已甚使爲馬阮浙東之續將何補乎聞者服之是年名振卒遺言以部下歸之於是軍容始盛乙未成功書約大舉丙申駐天台冬又駐秦川丁酉

大兵遷舟山之民煌言還軍舟山旣魯王去監國號乃通表



滇中戊戌永歷帝遣使進成功延平郡王加煌言兵部左侍郎兼翰林院學士我江督卽廷佐以書招之煌言復以書曰夫揣摩利鈍指畫興衰庸夫聽之或爲變色而貞士則不然其所持者天經地義所圖者國恨君讎所期待者豪傑事功聖賢學問故每羶雪自甘膽薪彌厲而卒以成功古今來何可勝計若僕者將略原非所長祇以讀書知大義痛憤國變左袒一呼甲盾山立崦嵫此志濟則顯君之靈不濟則全臣之節遂不惜憑履風濤縱橫鋒鏑之下迄今餘一紀矣同讎漸廣晚節彌堅練兵海宇祇爲乘時此何時也兩越失守三楚露布八閩羽書雷霆飛翰僕因起而匡扶帝室克復神州此忠臣義士得志之秋也卽不然謝良平竹帛捨黃綺衣冠

一死靡他豈諛詞浮說足以動其心哉乃執事以書通視僕  
僅爲庸庸末流可以利鈍興衰奪者譬諸虎僕戒途雁奴守  
夜旣受其役而忘其哀在執事固無足怪僕聞之怒髮沖冠  
執事固我明勳舊之裔遼陽死事之孤也念祖宗之恩澤當  
何如怨憤思父母之患難當何如動念稍一轉移不失爲中  
興人物執事諒非情薄者敢附數行以聞焉七月成功興師  
以監軍會之北行泊舟羊山山故多羊殺之則風濤立至軍  
士不能戒烹之羊熟而禍作碎船百餘義陽王溺焉遂返旆  
之舟山治舟己亥五月會於台悉師以行次崇明沙謂成功  
曰崇沙爲江海門戶有懸洲可守不若先定之以爲老營脫  
有疎虞進退可據不聽因請以所部爲前軍時

太兵於金焦間以鐵鎖橫江謂之滾江龍潭家洲岸皆西洋  
大礮煌言孤軍出入其間成功遣將助之令善泅者截斷滾  
江龍將奪上流木城而舟多爲礮沒不得前乃登舵樓焚香  
祝天飛火夾船下遂以十舟翦江渡木城俱潰明日成功至  
城中出戰不利成功欲趨金陵煌言欲先鎮江成功曰我頓  
兵鎮江金陵援騎朝發夕至奈何煌言曰我以偏師水道薄  
觀音門金陵自救不暇豈能他顧遂襲儀真未至五十里而  
士民迎降六月二十七日成功來告鎮江之捷煌言兼程還  
抵觀音門致書成功請以步卒陸行赴白下乃成功從水道  
來

大兵之征黔者凱旋聞信馳至同城守於是嚴備已具秋七

月朔以哨卒七人乘虛掠江浦取之初四日成功水師方至  
次日蕪湖降書至成功慮江楚援師屬煌言駐蕪湖以控上  
游煌言乃相度形勝一軍出溧陽窺廣德一軍鎮池州截上  
流一軍拔和州以固采石一軍入甯國以逼徽州傳檄郡邑  
大江南北相率送款郡則太平甯國池州徽州縣則當塗蕪  
湖繁昌宣城甯國南陵太平旌德涇縣貴池銅陵東流建德  
青陽石埭含山巢縣舒城廬江建平高淳溧陽州則和州廣  
德無爲凡得四府三州二十二縣煌言考察官吏黜陟廉明  
江楚魯衛人士多詣軍門受約束八月方詣徽郡受降而江  
甯之敗聞乃亟返蕪湖初煌言貽書成功曰師不可老老則  
生變宜速遣諸將分徇近邑如金陵出援我則首尾相擊如

其自守我則堅壁以待倘四面克復則收兵鱗集金陵在我掌中矣成功以累捷自驕又聞江北如破竹勢謂城可旦夕下但命八十三營牽連立屯釋戈開宴軍士捕魚縱酒爲樂而官軍之各路援師已長驅至偵其不備以輕騎穴城出襲破前鋒擒其將余新倉猝間士氣已餒拔營遁壘竈未安大兵復傾城出諸營瓦解成功之良將甘輝馬蹶被擒死遂大敗成功亟登舟乘流下海鎮江諸師并撤去先是鎮江之捷有漕督以援兵中道溺死松江水師提督馬逢知密以書請降自巡撫而下皆欲出走以故力勸成功持久觀變至是江督卽廷佐復以書招嚴拒之廷佐乃發舟師扼其歸路煌言與諸將議入鄱陽招集故楊萬諸子弟號召江楚八月七

日舟次銅陵與援師之自楚來者遇奮擊之沈其四舟已而  
夜戰不利義士魏耕請赴英霍山寨乃焚舟登陸士卒尙數  
百人初之霍山已受撫乃轉入英山甫度東溪嶺而追者至  
眾皆竄相從止一童一卒迷失道路茫茫無所歸念皖有故  
人賣藥於高許埠姑投之則故人無在也故人之友亦以觀  
變自江上來者識爲張司馬憐其忠惻教之由樅陽渡黃湓  
溯江而上抵東流之張家灘登岸走建德祁門亂山間比又  
病瘧力疾趨休甯買舟入嚴陵已復山行自東陽義烏出天  
台達海壩樹蘼鳴角招集散亡成功聞之亦遣兵來助海上  
有長亭鄉者多田而苦潮乃募義民築塘捍之遣使告敗於  
行在且引咎上專敕慰問晉本部尙書庚子駐師林門尋駐

桃渚辛丑入閩次沙關時成功欲取臺灣以休士已抵澎湖乃遣幕客羅子木以書責成功謂軍有寸進無尺退今一入臺則兩島並不可守是孤天下之望也不聽會有遷界之役煌言頓足歎曰棄此十萬生靈而爭紅夷乎復以書招成功謂可乘機取閩南卒不聽乃遣書故侍郎王忠孝都御史沈佺期徐孚遠監軍曹從龍勸其力挽成功而終不能用於是以孤軍徘徊兩島間已聞滇中事急復遣子木入臺苦口責之成功以方得臺不能行無已乃別遣職方郎中吳鉏挾帛書入鄭陽山中說十三家軍使之撓楚救滇而十三家已衰微不敢出壬寅滇中陷成功亦卒於臺乃哭曰已矣吾無望矣復還軍林門會閩南諸遺老以成功卒謀復奉魯王監國

貽書來商喜甚卽以書約故尙書盧若騰而丁勸以大舉又  
擬上詔書一道並約成功子經勸以亞子錦囊三矢之業厲  
兵束裝以待是年我浙督與安撫使各以書相招煌言謝之  
略曰不佞所以百折不回者上則欲匡扶宗社下則欲保捍  
桑梓乃因國事之靡甯而致民生之愈蹙十餘年來海上芻  
蕘糗糒之供樓櫓舟航之費敲骨吸髓可爲惕然況復重以  
遷徙訖以流離哀我人斯亦已勞止今執事旣以保民息兵  
爲言則莫若盡復濱海之民卽以濱海之賦畀我在貴朝旣  
捐棄地以收人心在不佞亦暫息爭端以俟天命當與執事  
從容羊陸之交別求生聚教訓於十洲三島間而沿海藉我  
外兵以禦他盜是珠厓雖棄休息宜然朝鮮自存艱貞如故



特恐執事之疑且畏耳則請與幕府約但使殘黎朝還故土不佞卽當夕挂高帆不重困此一方也又復督府書曰執事新朝佐命僕明室孤臣區區之誠言盡於此時閩南消息旣杳鄭經則偷安海外因悒悒日甚甲辰六月乃散軍居南田之懸巖懸巖在海中荒瘠無人烟惟山南有汶港可通舟楫其北則峭壁巉巖人不能及遂誅茅以居從者祇故參軍羅子木門生王居敬侍者楊冠玉將卒數人舟子一人朝議謂煌言不死海盜且復逞也奉

旨購之有司繫累其妻子族屬以待募得其故校使投舟山之普陀僞爲行腳僧以伺會煌言告糴之舟至糴人昵其故侶且爲僧不之忌故校遽出刀脅之駢殺數人最後者乃告

之曰雖然公則不可得也公蓄雙猿覘動靜船在十里外猿  
輒鳴樹杪公得爲備矣故校乃於夜半潛上山背攀蘿踰嶺  
而入暗中執煌言並子木冠玉舟子三人七月十七日也越  
二日至甯波我提督張燕以客禮舉酒屬曰遲公久矣曰父  
死不能葬國亡不能救死有餘罪今日至此速死而已燕遣  
官護之入省出甯波城再拜曰某不肖有孤故鄉父老二十  
年之望登舟危坐夜半有坐蓬下唱蘇武牧羊曲者煌言披  
衣起扣舷和之酌酒勞曰爾亦有心人也吾志已定爾無慮  
叩其姓名則防卒史丙也渡泉塘舟中拾一箋句云此行莫  
作黃冠想靜聽先生正氣歌煌言笑曰此王炎午後身耳比  
至杭州供帳如上賓舊時部曲許存問官吏願見亦弗禁有

賄守兵以一睹爲幸者九月七日赴市遙望鳳凰山曰好山  
色賦絕命詞挺立受刑年四十五子木冠玉舟子並從死子  
萬祺械至鎮江先三日死初煌言之入海也風飄至一荒島  
夢金甲神告曰贈君千年鹿遲十九年還我果得一蒼鹿食  
一嚮積日不饑比糴人未返占課大凶徘徊假寐又夢金甲  
神來方呼居敬告之言未旣而兵入蓋十九年云浙人張文  
嘉萬斯大葬諸南屏山麓子木等附焉子木名綸以字行溧  
陽人已亥見煌言於江上嘗參朱成功軍不樂奉父復就煌  
言中道與

王師遇格鬪墮水比救起則父已被縛去思出奇計救之不  
得嘔血瀕死煌言勉以立功報讎遂相依以及於死冠玉勤

人制府以其年少將脫之固請從死居敬字畏齋黃巖人以  
計逸爲僧故校以誘執煌言功授千戶奉令巡海猝遇煌言  
舊將憤其害主也突刺殺之我

朝賜煌言通諡曰忠烈

男承禮編輯

仁和魏錫曾參校  
會稽梁繼元覆校

小腆紀傳卷第四十四終

小腆紀傳卷第四十五

前翰林院檢討加詹事府贊善銜六合徐鼐謨

列傳第三十八

王之仁

子鳴謙

張鵬翼

弟鵬飛 季熊

張名振

焦文王 楊復葵

王朝先

阮進

阮駿

周鶴芝

弟瑞

鄭遵謙

鄭彩

王之仁直隸保定人官定海總兵宏光時掛鎮倭將軍印乙酉夏南都既覆鄞縣紳士錢肅樂與諸生華夏等六人起義故太僕謝三賓家富耦國方西行納款歸密使貽書之仁曰翁翁訛訛出自庸妄六狂生而一穉紳和之將軍以所部來

斬此七人則事定矣某當奉千金爲壽穉紳者肅樂年未四十也會肅樂亦遣諸生倪懋熹勸之仁來歸之仁兩答之期十五日至至則大會諸鄉老突出三賓書數其罪三賓叩首乞命願出萬金助餉之仁遂從肅樂締盟共城守魯王監國封武甯伯分守西興尋進侯旣江上諸軍與

王師屢戰不勝西望心灰之仁上疏監國曰事起日人人有直取黃龍之志乃一敗後遽欲以錢塘爲鴻溝天下事何可忍言臣願以所隸沈船一戰今日死猶戰而死他日卽死恐不能戰也明年三月朔

王師驅船開堰入江張國維敕各營守汛命之仁率水師從江心襲戰會東南風大起之仁揚帆奮擊碎舟無數鄭遵謙

獲鐵甲八百餘副諸軍繼之遂大捷踰兩月諸軍以糧乏潰  
監國航海之仁載其妻妾二子婦幼女諸孫沈諸蛟門外再  
拜捧所封敕印投焉乃立旗幟張鼓吹揚帆抵松江戎冠登  
岸眾謂其降也護至金陵洪承疇令其易服薙髮之仁笑曰  
我握兵柄爵通侯謀人國事而無成死固分也然葬於波濤  
身死不明故就此以求死耳遂見殺子鳴謙字益公之仁既  
封侯鳴謙襲鎮倭將軍駐定海之蛟關有張國柱者劉澤清  
部將也依鳴謙於海上有弓箭手五百人劫鳴謙掠餘姚行  
朝震恐亦署國柱以將軍之仁死黃斌卿誘殺鳴謙而並其  
眾國柱再爭之亦敗

張鵬翼字耀先諸暨人世以軍功授職弟鵬飛季熊皆有勇



善戰鵬翼初以總兵掛淮海將軍印遷中府左都督乙酉五月南都亡與右都督徐洪瑋率兵六千航海至越江上師起卽斬將自守駐江干潮至帳淹無敢離伍者魯監國封爲永豐伯出鎮衢州明年六月

大兵至標下副將秦應科等約爲內應城破巷戰與弟鵬飛同被執不屈自刎死洪瑋亦死季熊禦嚴州戰敗力竭匿村巷中追騎至令村民獻之季熊突出大吼曰大丈夫肯避爾者邪復手刃數十人援絕躍上屋拾瓦四擊坐屋脊罵攻益急拔鞞刀自刎屍直立三日不仆時稱張氏三忠云我朝賜鵬翼通諡曰烈愍

顧勛會稽人魯監國封忻誠伯江上之敗也勛守嚴州與

王師相拒累日闔家慘死

張名振字侯服江甯人少伉爽有大略壯遊京師太監曹化淳延爲上賓化淳以王安門下故與東林親名振亦遂得與復社諸人通聲氣熊開元之廷杖也名振陰屬杖者得不死而實未嘗識面也崇禎癸未授台州石浦遊擊南都破安撫使至浙東不受命魯王監國加富平將軍時黃斌卿鎮舟山名振與相犄角議由海道窺崇明擾三吳以爲錢塘援未行而江上潰監國脫方國安之危走石浦南田名振棄石浦扈監國會斌卿誘殺王鳴謙叛將張國柱悉定海之眾以攻舟山斌卿求救名振破走之名振旣與斌卿爲兒女姻又拯其危乃勸斌卿納監國斌卿不從適永勝伯鄭彩至以其軍扈

監國入閩名振得封定西伯請歸浙中招部曲及還而石浦已歸附我

大清乃入舟山依斌卿斌卿見其勢孤稍侮之丁亥我松江提督吳勝兆謀叛通書舟山請一軍合力向南都斌卿猶豫不欲應名振方有自遠之志沈廷揚張煌言等又慫慂之遂自以其軍赴約請之監國給敕印二百道命煌言爲監軍太常寺丞任文正副之賜給事中徐孚遠一品服充行人司聯鯨二千餘北上次黃連港惡其名將移之白沙傳令洗礮龍驚浪鼓颶風大作全軍盡覆弟名遠被擒死之名振於洪濤中浮篷上不死登岸暗行二十里遇僧一泓者爲剃髮易服一泓爲

王師所誅而名振獲免復入海斌卿標將朱玠欲因是殺之斌卿未之許而以其無軍益侮之名振乃託言屯田避之南山初名振之救斌卿也部將阮進最有功斌卿不德名振而忌進之爲名振用也間進使叛及北發進以不習三吳水道辭取船二十艘脫歸閩海招軍頗盛得封蕩湖伯旣而監國所復閩地盡失名振自南田復健跳所招進復與合扈監國駐健跳斌卿旣不奔問官守進告繹又不應怒結平西伯王朝先傳檄謂海上諸島滄洲稍大共誅斌卿奉王駐軍名振故與斌卿姻好陽阻之而諸軍卒擊殺斌卿己丑冬十月監國入舟山名振晉侯爵太師當國王朝先有標槍手八千旣誅斌卿并其軍一不以付名振名振忌而襲殺之其部將張

濟明跳而降於

王師爲前導辛卯八月分道並進名振以蛟關天險海上諸軍熟於風信敵必不能猝渡乃留阮進守橫水洋弟左都督名揚安洋將軍劉世勛守舟山自帥兵奉監國搗吳淞以牽制之或謂曰物議謂公藉此避敵名振曰吾母妻子弟皆在城中吾豈有他心哉尋阮進敗死九月丙子日午刻諸軍力不支城陷時名振會師火燒門外離城六十里候潮長還救突見城中烟焰蔽天知不可救乃解維去尋聞母范氏妻馬氏弟名揚偕其幼弟及妾闔戶舉火自焚死慟哭曰臣誤國誤家死不足贖奮身欲投海監國與諸將救之乃止乃復扈監國航於海明年春次於鷺門收餘燼往見朱成功成功大

言曰汝爲定西侯數年所作何事名振曰中興成功曰安在  
名振曰濟則徵之實勩不濟則在方寸間耳成功曰何據祖  
而示之背赤心報國四字長徑寸深入肌膚成功愕然謝曰  
久仰老將軍大名奈多憎之口何出歷來謗書厚尺許名振  
遽火之成功待以上賓行交拜禮指腹聯姻贈以萬金哆囉  
呢五十匹日本刀一口爲名振聘王氏女秋拜名振爲總制  
犯漳泉戊辰春名振請兵北上與之兵二萬糧三艘獲叛將  
金允彥於金塘山磔之祭死事諸臣仁武伯姚志倬誠意伯  
劉孔昭偕其子永錫以眾來依號召舊旅破京口截長江駐  
營崇明尋被讒撤回廈門甯靖王術桂爲力辨於成功及相  
見語至夜分更益以兵而令陳輝王秀奇洪旭周全斌偕行

至羊山颶風折兵十之一惟名振全軍無恙九月復駐平陽糧絕名振與士卒同餓有太師枵腹我輩忘飢之謠軍得不散十二月朔我崇明駐防兵萬餘馬三百匹乘凍涉江入平陽沙名振鼓眾迎之浴日將軍王善良挺矛當先姚志倬任麟王有才以三百人衝其左張煌言王浚以三百人突其右崇明兵大敗無一返者甲午春正月名振以上游有蠟書請爲內應率海艘數百遡流而上再入京口掠儀真至觀音門十三日泊金山遙祭孝陵設醮三日揮淚題詩云十年橫解一孤臣佳氣鍾山望裏眞鴉首義旗方出楚燕雲羽檄已通閩王師桴鼓心肝噎父老壺漿涕淚親南望孝陵兵縞素會看大纛禡龍津越二日掠輜重東下旌旗蔽江四月復以海

艘上鎮江焚小閘至儀真索鹽商助餉金不得焚六百艘而去尋以海船六十入山東登萊諸處直抵高麗乃還乙未成功拜名振爲元帥陳輝洪旭陳六御副之統二十四鎮入長江我甯波守將張洪德降名振養爲義子進攻舟山我鎮將巴臣功之中軍陳虎力戰死臣功降授爲鐵騎鎮改名臣興名振徒步入城痛哭以祭其母哀動三軍是年十一月我台州副將馬信降於名振名振不之信納母爲質許之將入見而名振已寢疾丁未戌刻有大星隕海光芒如電有聲亥刻名振起坐擊牀連呼先帝數聲而逝葬於蘆花畧有白鶴成羣盤旋數日而去遺言以所部歸張煌言論者謂陶謙之讓豫州不是過也



焦文王楊復葵皆山西人張名振標下副將也以誅黃斌卿功晉總兵文王善射有膽略後負重傷自刎屍不朽妻張氏葬之畢亦自刎有夫忠婦烈之哀復葵以標將挾之投誠赴水死

王朝先舟山人或云故土司以調征塞上入內地驍勇善戰初從張國柱王鳴謙入海黃斌卿三書招之朝先以二艦渡橫水洋斌卿標將朱玖陸偉以假迎劫之朝先跳水免妻子死焉旣見斌卿留之部下而不以事任鬱鬱不得志張名振解衣衣之贈千金朝先心歸焉請於斌卿徇海邊徇奉化之鹿頭鎮有眾數千名振以之歸魯監國己丑秋朝先取糧溫台斌卿標將黃大振得罪構之曰將軍家口標屬破本爵鈔

東京三千餘里馳道橋梁驛遞公館修輯以待中國使臣之至鶴芝大喜益備珠璣玩好之物以悅之參謀林籥舞爲使期以四月十一日東行而祇卿止之曰大司馬余煌書來云此吳三桂之續也鶴芝怒而入閩張肯堂出師北征以鶴芝爲前將軍鄭芝龍之將降也以書招鶴芝計事至則降已決鶴芝與監軍朱永祐流涕諫不聽鶴芝曰某海隅亡命耳無所輕重所惜明公二十年威望一朝墮地爲天下笑請得効死於前不忍見明公之有此舉動也抽刀自刎芝龍起奪之數日芝龍竟北去遂與永祐移軍海壇明年丁亥二月復海口鎮東二城以籥舞及總兵趙牧守之魯監國封爲平彝伯五月海口復失籥舞牧皆死之鶴芝度

王師勢盛不能抗乃還守火燒嶼七月從魯監國會師攻福州敗績己丑冬監國駐蹕舟山進侯與其弟閩安侯瑞分屯溫州之三盤嶼以爲犄角居無何與瑞有隙監國命武陵人胡明中往解之至則搆之益甚瑞遂南依鄭彩鶴芝亦北依阮進彩之扼於朱成功也鶴芝欲結好成功與進擊破彩眾舟山亡依成功以終瑞字雲麟從魯監國禡牙舉事得封伯旋進侯後亦依成功庚子五月拒

王師於海門與五府陳堯筴俱戰死

鄭遵謙字履恭會稽諸生山西僉事之尹子也放誕喜結客扛鼎擊劒之徒日盈其庭妻嘗殺人推官陳子龍論坐之東陽許都救以免後都作亂遵謙將從事其叔扇戶不聽往乙

酉杭州降乃集其徒號義興軍舉旗過清風里殺我山陰知縣彭萬里署紹興知府通判張榛取庫中兵仗給士卒表迎魯王監國諸義旅一時並起詔爲義興將軍與熊錢諸軍分守小巒號眾數萬明年偕諸軍戰江上獲鐵甲八百餘副後爲田仰方國安王之仁輩所扼勢寢衰江上潰之尹投水死遵謙從監國入海晉封義興伯偶與鄭彩爭洋船有隙及彩讎殺熊汝霖遵謙益不平彩乃詐撲部將吳輝令扶傷就遵謙求書投鄭鴻達遵謙過輝船送之被掄輝旣掄而慙伏艙底不出遵謙呼曰汝鄭彩廝養殺我豈出汝意而相避乎輝出遵謙乞隻雞孟黍哭奠汝霖畢蹈海死遵謙之妾金四姐者痛夫之死束藁像彩每祭寸斬以侑食彩聞又沈之我

朝賜通諡曰節愍

鄭彩芝龍從子或曰鴻達子者誤也宏光時以水師副將偕鴻達守鎮江乙酉四月

王師渡江鴻達彩自杭州奉隆武帝入閩福京立封永勝伯充御營右先鋒出江西明年四月吉安陷彩棄廣信奔入杉關

王師乘之克撫州永甯王慈炎死之上震怒削彩職令戴罪圖功閩敗彩以所部入海適張名振奉監國魯王至舟山守將黃斌卿不之納監國跋扈無所歸彩乃奉之入閩次中左所芝龍已投誠密令彩執監國歸命彩匿監國以南夷貌類者

服監國冠服居舟中謂守者曰事急則縊以示之監國獲免時

成功亦駐廈門以唐魯舊嫌不欲奉監國彩乃改次長垣明年丁亥正月監國以彩爲元帥封建國公自是專橫大學士熊汝霖每折之又與義興伯鄭遵謙爭洋船有隙會戊子正月元夕熊鄭兩家相問遣部將李茂遠以合謀告變彩襲殺汝霖並遵謙劉中藻攻福甯彩掠其地諸鎮遂大惡之己丑閩地盡失張名振自健跳所遣使迎監國彩乃棄監去與弟定遠伯聯據廈門將有事於海南戒聯曰飢虎不可爲鄰國姓揚帆往來宜備之聯不之信未歸聞聯死求援於張名振名振方自結於成功不應而反以墮之成功度彩已困遣其將洪政折矢招彩乃以所部付之歸老廈門己亥秋坐廳事忽見熊鄭擁兵入驚撲階下七孔流血死

男承禮編輯

仁和魏錫曾參校  
會稽梁繼元覆校

小腆紀傳卷第四十五終

小腆紀傳卷第四十六

前翰林院檢討加詹事府贊善銜六合徐翦

列傳第三十九

義師一

凌 駟從子潤生 馬元驤 謝 陞

沈 迅許來春弟 高 桂等 劉孔和

殷 淵宋湯齊王拱辰 郭 珩 吳 易孫兆奎弟 沈自暉

華 京吳旦 趙汝珪 吳 鑑 周 瑞

張飛遠陸世綸 茹略文 周志韜 任源窳

徐安遠朱旦 盧象觀弟象同 陳坦公

韋志斌 李伯含 閻應元陳明遇 許用德

潘文煥 葛 麟 顧 杲王謀 張龍文



沈猶龍

章陸明永簡等

李待問

周室瑜

朱集璜陳大任等

陶城

王湛

兄涪魏虎臣

蔡仲昭

侯炯曾

弟岐曾子元演

元潔

黃醕耀

弟淵耀張錫眉等

金聲

江天一姜孟卿等

邱祖德

沈壽堯吳太平等

麻三衡

尹民興

吳漢超趙初浣

吳應箕

龐昌胤吳源長

裴君量

謝

琢

錢國華繆鼎吉

司石磐弟鼎言

周損

傅夢鼎桂蟾等

傅謙之

王

嫻

侯應龍馮宏圖

李虞夔

子宏萬

練等

凌駟字龍翰歙縣人崇禎癸未進士以主事贊畫督師李建泰軍建泰降賊駟遁至臨清募兵三千權州印部署鄉勇斬偽防禦使王皇極等三人復臨清濟甯傳檄山東遠近響應於是土寨來歸者甚眾與德州謝陞遙相應已聞南都立聞

道遣人上疏言臣以鉛槧書生未諳軍旅先帝過簡置之  
間遭值危亡不能以死殉國乃以萬死餘生糾集義旅討擒  
僞逆誠欲自奮其桑榆之效然不藉尺兵不資斗粟徒以忠  
義二字激發人心方今賊勢猶張東師漸進臣已上書彼國  
大臣反覆懇切不啻如秦庭之哭矣然使東師獨任其勞而  
我安享其逸東師克有其土而我坐受其名恐無以服彼之  
心而伸我之論爲今日計或暫假臣便宜權通北好合兵討  
賊名爲西伐實作東防俟逆賊旣平國勢已立然後徐圖處  
置之方若一與之抗不惟兵力不支萬一棄好引讐并力南  
向其禍必中於江淮矣臣南人也卽不肖而有功名之想尙  
可幾幸於南但恐臣一移足大河之北便非我有故忍苦衷

據於此以爲他日收拾河北畿南之本夫有山東然後有畿南有畿南然後有河北臨清者畿南河北之樞紐也與其以天下之餉守淮不若以兩河之餉守東乞擇使臣聯絡北方以弭後患宣慰山東以固人心又言膠州對岸爲廟灣宜設水師一旅與青齊義勇相結援東郡可不勞而下而是時朝議方以江北分四鎮無一人計及山東者疏入不省駟孤軍難自立亦時與我

大清通書問東昌下駟南走大名我

朝以兵科給事中印劄招之駟懸之陳橋驛獨身至南都入對授監察御史代陳潛夫巡按河南駟疏言臣今與各寨將領約分地畫守倣古人合縱之策一寨破約各寨致討以長

河爲邊垣以各寨爲州縣以守爲戰以農爲兵臣寢食於河  
創痕風裂不敢自逸詔吏兵三部給空札百餘以待歸正之  
人實無一軍相策應迨許定國李際遇旣降導我兵南渡駟  
行部至歸德以土兵數百守城遊擊趙擢說降駟斬以徇次  
日率兵出西城斫營而守者已開東北門迎降我豫親王多  
鐸下令須生致凌御史否且屠駟乃以兩印投井中命參將  
吳國興齎敕旨並遺疏入奏云臣誓不受辱屬者仰藥引劍  
兩被強持因思慷慨而殃及小民何如從容而善全大節臣  
母年七十登第未遑一省子年四歲尙未識面受命疆場義  
不返顧伏乞大奮乾斷速定戰守之策則臣死之日猶生之  
年南向拜訖單騎見豫王從子潤生從焉豫王曰御史私渡

河復抗大軍何也。明曰：以大明官歸大明，何云私職？授監軍，恨兵微，不得一戰。何云抗長揖不拜？豫王手金爵賜之酒，駟曰：天性不飲也。越日無降意，乃取學道蔡鳳監軍道吳琦於階前斬之。顧明曰：公以首領易虛名乎？遺以大帽貂裘革鳥不受，強留之中夜，謂潤生曰：吾忍死守此土，以爲江南屏蔽，今已矣。遺書豫王曰：願貴國無負初心，永敦鄰好。大江以南，不必進窺，否則揚子江頭，凌御史卽錢塘江之伍相國也。與潤生同縊死。豫王殯之，察院署吏民皆哭失聲。事聞，贈兵部侍郎、潤生御史。

馬元騷，德州貢生，謝陞諸生也。時香河知縣宗室卽欽棄官走，吳橋僞防禦使閻傑囚之。德州又酷比餉銀，民不堪命。元

驟陞因之一呼而起執傑與僞州牧吳徽文縶而食之奉帥  
欽權稱濟王移告遠近殺僞官覓青登萊諸州皆堅壁自守  
陞卽南中譌傳以爲故相謝陞者也

許來春泰安州人甲申三月京師陷知州朱萬欽聞之逃僞  
防禦使牌示軍至軍妻軍去民妻八字州人大懼來春與原  
任遊擊高桂糾槍手百餘人伏南城外四月丙戌奪門入執  
僞防禦並其黨數十人斬之僞將郭昇自覓州來攻陷州城  
來春與桂死之同死者治中蕭協中生員■國鉉投井死舉  
人徐枏城頭罵賊死生員王德昌巷戰死房伯龍黃應瑞劉  
孔訓蕭獻吉楊應薦胡會隆趙聖文先後不屈死布衣馮魁  
軒閩家自焚死

沈迅萊陽人迓其弟也迅中崇禎辛未進士由知縣考選得刑部主事大恚恨結楊嗣昌改兵部尋擢兵科給事中數言事皆中旨初廷臣好言兵者任事輒償敗獲罪於是更諱言兵迅極言其弊乞敕廷臣五日內陳方略帝從之擢禮科都給事中尋以薦高斗光爲鳳陽總督謫國子博士復官未赴而京師陷家居與迓設砦自衛迓短小精悍馬上舞百斤鐵錐兄弟率里中壯士捕土寇略盡

王師被砦闔門死之我

朝賜通諡曰節愍

劉孔和字節之長山人故大學士鴻訓子也長八尺目炯炯如電平居論天下事輒憤激鬚髯怒張甲申三月起兵長白

山殺僞官率眾南下劉澤清使客說之乃以兵屬焉澤清故  
武人不知書旣貴好爲詩嘗大會詫示坐客眾交口譽之孔  
和仰視不語強問之則大言曰國家舉淮東千里付足下未  
聞北向發一矢詩卽工何益國事况未必工邪澤清怒罷酒  
坐客惶懼孔和拂衣徐出澤清益不平遣壯士追及舟中拉  
殺之時朝命孔和爲副總兵命下而孔和死數日矣處士聞  
再彭靳壁星重金購遺骸不可得時年三十一著有日損堂  
集嘗贈友人王遵坦句云都無殺者黃江夏豈有食之嚴鄭  
公人以爲詩識云

殷淵雞澤諸生父太白官監軍副使以事爲督師楊嗣昌所  
殺淵志欲報讐賊破雞澤尋陷京師偕諸生黃公祐等約由



中壯士誅賊所置官僞令秦植踉蹌走乃入城行服臨禮義聲大震已爲奸人所乘被殺又朱湯齊郭珩王拱辰三人皆肥鄉諸生起兵討賊爲賊將張汝行所殺

吳易字日生吳江人負文武才跡弛不羈中崇禎癸未進士不謁選宏光時督師史可法題授職方主事留之監軍乙酉奉檄徵餉未還而揚州失守易與舉人孫兆奎起義諸生華京吳旦趙汝珪等皆從之與陸世鑰沈自炳諸軍合屯長白蕩出沒五湖三泖間松江盜首沈潘劫掠不常易計擒之降其眾獲艘七十

王師之初至也未習水戰易使部卒狎於水者雜農民散處湖畔

王師索人操舟則散處者咸集棹至中流鑿沈之溺死無算  
時部郎王期昇吳景亶等起兵西山克長興然兵不及易強  
多棄之來歸隆武帝授兵部右侍郎兼右僉都御史總督江  
南諸軍侍郎楊文驄奏易斬獲多進兵部尙書封忠義伯魯  
監國亦授易兵部右侍郎封長興伯我總兵李遇春率兵五  
十四艘自平望至白龍橋列陣三十里易與兆奎會沈白炳  
自駟之軍破走之已而提督吳勝兆敗盧象觀葛麟遂引兵  
追易兆奎率銳卒伏蘆葦中襲殺甚眾易眾方醺酒賀俄勝  
兆合四郡兵至石樁橋斷港以易軍無見糧遂大潰易與驍  
騎三十人潰圍走父承緒妻沈及女皆投水死兆奎等皆戰  
死一軍盡殲易之潰圍走也舟重三十人盡覆易泗水半里

從子某見水面紅快鞋謂易已死以追兵急不得挈取之繫舟尾半里許始舉視之尙未死張目問曰吾兵尙有幾何左右曰百人耳易曰速返追擊此去必獲大勝果奪其輜重而還明年春吳江人周瑞者復聚眾長白蕩迎易入其軍未幾眾潰飲孫璋家偵者引

王師至被獲殺於杭州草橋門我

朝賜通諡曰節愍

孫兆奎吳江舉人佐吳易募水卒旬日間得三千人或阻之曰

清起遼左自神宗以來竭中華全力僅足搆拄江南所恃惟水戰而大眾深入險要悉爲憑守舟楫無所用其長大勢若

此而妄有所圖乎兆奎曰我豈不知但恨三百年養士而義聲寂寂我故欲以一身殉之其成敗則聽之天耳時浙東人李九成者假名建義以戰艦千艘宵晝劫掠兆奎與易密謀僞結好以弛其備約期兩軍合營或以大敵方強不宜自翦羽翼兆奎曰不然今日之事正如寸刃剗鯨空拳搏虎所恃以號令人眾者惟此區區之信義耳若縱彼焚掠則所在之民誰非寇讐是敵未至而先自敗矣八月七日遣驍將許某統十三艘往討先有黑氣如長堤直撲李營而隕北風大起塵埃漲天未幾復大霧咫尺不相覩李營之眾以爲吳軍來合營也俄而礮聲大起兵四集李眾大潰九成就縛斬之所俘婦女皆遣還時起事諸人多驕暴爲民害惟易兆奎整戎

卒戒侵掠眾頗效命嘗敗

王師於白龍橋又敗之於八斥眾釀酒賀而兆奎戒其下謹備八月二十四日

王師大集石樁橋或勸兆奎走海兆奎曰今四圍皆兵海其可至乎事之不濟我將橫屍水上豈能竄海苟活邪黎明王師八面環攻時陰雨連旬舉礮礮不震持弓弓絃解兆奎往來督戰自寅至午

王師益眾易潰圍走兆奎慮易妻女被辱視其赴水然後行遂爲追者所獲械至江甯見洪承疇大言曰崇禎時有一洪承疇身死封疆先帝親祭哭之今又一洪承疇爲一人邪兩人邪承疇曰咄爾自爲一人事可耳驅出斬之臨刑顏色不

變年三十九

沈自微自炳自馴皆吳江諸生副使琬之子也兄弟以詞翰聞江左任俠自負自微嘗辟賢良方正不就見天下亂造漁船千艘匿太湖以備非常未幾及自炳自馴收其船以集兵吳易一軍所出起也長白蕩之潰皆戰死或曰沈於湖又華京吳旦趙汝珪皆吳江諸生之有志行知名於時者也從吳易舉兵眾潰京驅妻子入水格殺數人與大兵搏戰相持不釋同溺死旦汝珪亦死

吳鑑吳江諸生乙酉六月

王師徇吳江縣丞朱國佐以城降鑑入縣庭罵之國佐執送蘇州知府詢其黨抗聲曰孔子孟子張睢陽顏平原是也何

問爲遂殺於胥門學士街吳易聞而哀之率眾擒國佐授鑑  
父汝延令殺以祭鑑

周瑞一作周毓祥蓋名字之互見也長白蕩之師旣潰丙戌  
春瑞復聚四保漚

王師討之死者八百人軍聲遂振迎吳易入其營五月五日  
泛蒲飲酒

王師掩至殺其將羅騰蛟未幾與吳易被執於孫璋家見殺  
張飛遠亦吳郡諸生負膂力聚眾與吳易合營丙戌五月六  
日襲金山衛我守將出戰飛遠遁去初飛遠約城中內應者  
墨其鼻飛遠遁而城中人鼻尙墨也悉就誅

陸世鑰吳江諸生以財雄於洞庭東湖有十將官者集眾于

餘屯湖中世鑰慮其爲亂亦聚千餘人名爲犄角實防遏也  
難髮令下鄉民駭愕洵洵思亂十將官因邀世鑰起兵與吳  
易沈自炳諸軍相應和時兵多肆劫惟世鑰毀家充餉部下  
妄掠一錢者必死故一軍獨戢兵敗爲僧去

茹略文字振先餘姚人吳易之部將也驍勇善戰初入太湖  
從徐雲龍破長興屢戰有功後歸易奏授總兵長白蕩之敗  
略文手斫數十人身被十餘創血盡而仆兵疑其佯死連刃  
之兵去稍甦捧其頭以走至潯溪休於野廟廟祝故識之傳  
以良藥百日愈後與

大兵戰於麻湖援絕乃死其將周志韜收餘眾自保魯監國  
遙授爲參將久之兵敗赴水死又有戴之雋亦作戴武功周



謙亦作周長吉蓋名字之互見也皆吳郡諸生從吳易起兵長白蕩兵敗諸起義者皆死二人降於提督吳勝兆教之通舟山黃斌卿合力取南都事敗勝兆誅二人亦見殺

任源邃吳福之徐安遠皆武進諸生起兵與吳易軍相應者也源邃深沈有大略見所在起兵者皆不當意喟然曰天下事遂無可爲乎我視諸軍皆兒戲耳及福之安遠起兵約源源同就李總兵者合爲一軍屢與

王師戰歷三月始潰李總兵自刎死源邃執至溧陽官命之跪源邃曰若非明臣邪見我不愧死而欲屈我乎曰子年少姑待之源邃曰汝惟有待故至此我何待速死耳乃見殺安遠亦不屈死妻楊氏妾蕙香殉之福之詳吳鍾繼傳而卒

兵者名字里居不可詳

朱旦蘇州人祖名鷺世所稱白民先生者也嘗撰建文書法  
疑表章遜國諸臣將進呈請復革除年號不果隱於西華山  
總兵吳志葵等之襲蘇州而敗也旦奮然曰昔我祖作書忠  
建文帝今我舉義忠先帝死猶生也拜母訣別走太湖說黃  
蜚不應再遺書促志葵亦不應乃偕西山徐雲龍等薄胥門  
王師衝突而出雲龍斷甲走其弟君達僧景嗤皆戰死旦亦  
遇害同時邑人韋志斌李伯含皆以武勇稱志斌從魯之與  
戰城中之南園死焉伯含率眾至盤門墮水死

盧象觀字幼哲宜興人故宣大總督象昇弟也崇禎壬午舉  
鄉試第一癸未成進士官中書舍人象觀習家學以仕晚未

獲用乙酉六月

大兵南下與宗室盛懃遇西湖相與痛哭入于忠肅祠誓同  
起兵至茅山以象昇故將陳坦公爲先鋒謀攻南京都人朱  
君兆奇士也爲之計曰南京雄深未易拔况北兵四面萃於  
我敗道也蓋謀內應者乎願爲公先入結其豪定期告我我  
從中以火爲應已而遣僧詣君兆約期僧乃密叩我大營告  
變舉火誑之象觀兵薄城下燒太平門騎兵突出衝擊象觀  
駭敗精銳盡喪盛懃匿水竇中得逸已復與象觀至宜興收  
士卒攻溧陽又敗盛懃亡入都司方明軍象觀遂亡入太湖  
與葛麟王期昇合有眾二萬奉通城王盛徵居長興八月二  
十八日陣於小涓壘戰久之麟敗歿象觀知不免起拜其眾

曰我兄弟受國恩無以報空煩公等死有餘愧躍入水誓下  
掖之出歎曰愛我者不如成我義也復自沈以死從弟諸生  
象同先鋒副將陳坦公總兵毛重泰俱死之諸生象晉象觀  
兄也爲僧終我

朝賜象觀通諡曰忠節

方明字開之廣德屯田都司也起兵據廣德宗室盛瀝之敗  
於溧陽也明迎之入其軍號召義旅連破孝豐臨安甯國等  
縣聲勢頗振閩中封盛瀝爲瑞昌王明等授官有差無何降  
將張天祿自徽州還師明不能禦棄營走浙東明年潛還長  
興眾疑爲謀者執付防將郭虎所一小卒指曰此方明也遂  
斬之初明之敗也有鎮江人潘文煥者匿瑞昌王盛瀝於茅

山民舍其部曲喜正赴京口置弓矢事覺有司雜治之遂殺盛瀝事連文煥文煥見喜正切齒罵曰吾死何足惜王能一日在則人心一日未散鼠子乃壞吾大計奮起批其頰其子哭文煥曰我死忠汝死孝傳之後世有頌述焉不然一老氓也誰復知械至金陵洪承疇欲屈之不可乃被殺一女亦不食死

葛麟丹陽人與盧象觀同舉於鄉有膂力能開數石弓宏光時巡撫祁彪佳薦其才勇授中書舍人與鄭鴻逵協守京口上便宜十二事又請練兵江北皆不報京口破過家門不入走海上佐總兵吳志葵起兵攻復青浦志葵敗潰卒無所歸推麟爲帥乃揚帆抵太湖與郎中王期昇合營未幾象觀亦

至軍遂盛期昇不能軍惟以剽奪鄰近爲事民苦之引  
大兵焚其舟期昇遁象觀危甚麟望見火光率三舟衝之軍  
吏曰眾寡弗敵毋陷死地麟曰臨難不救同盟之謂何手擲  
長矛奮力戰所當披靡連殪百人於湖

大兵耳其名羣目之譟曰長而肥者葛中書也萬箭注之麟  
揮矛如風箭悉墜入水乃更攻以火舟焦始自沈

閻應元字麗亨順天通州人崇禎中爲江陰典史甲申海盜  
顧三麻子以百艘乘潮至黃田港應元率鄉兵拒戰手射三  
人應弦倒以功加都司銜遷廣東英德主簿道阻未赴寓江  
陰之砂山乙酉六月薙髮令下諸生許用德倡言於明倫堂  
曰頭可斷髮不可薙眾曰然則城守乎以閏六月朔設太祖

高皇帝像眾拜且哭遠近應者數萬人推新典史陳明遇爲主囚知縣方亨殺守備陳端之以徽人邵康公爲將前都司周瑞龍泊江口相犄角與

王師戰不利徽商程璧出家貲二萬五千金充餉而身乞師於總兵吳志葵康公戰不勝瑞龍水軍亦敗去勢益危明遇謂眾曰吾不如閻公智勇可屬大事馳騎迎應元應元率家丁十四人夜馳入城召士民盟之曰今日之事非有所強於諸君者諸君其無以生死計眾諾之應元則料尺籍治樓櫓戶出一男子登陴餘丁傳餐發前兵備道曾化龍所治火藥器貯城樓勸輸巨室曰輸不必金凡菽粟芻藁布帛酒醕鹽醢皆是也城苟完何患無財四門分堡而守如南門堡內人

卽一人守南門堞戰則兩人守之晝夜輪換十人一小旗一銃百人一大旗一紅夷礮夜則五堞一燈

大兵之攻城者空船及棺負之蔽以牛皮城上礮石碎之一人駕雲梯上城上一童子提而斬之時

大兵南下若破竹守土官非降卽走間拒守攻之輒拔及至江陰境輒多殺傷乃相與大駭於是薄城下者兵且十萬列營數百圍十重依山起壘瞰城中矢集如雨城上發礮石中之夜遣壯士縋城下順風縱火軍亂自相踐踏死傷萬計乃移營去居民黃雲善作弩傳以毒藥中人則死守備陳端之子某在獄請以造軍器贖死製木銃投城下近者輒糜爛應元出新意造鐵撾繫以長繩能城上刺入十步外



大兵發大礮城裂應元用鐵葉裹門板貫鐵索護之實空棺  
以上障潰處北城壞於城內更築堅壘一夜成又嘗以矢盡  
束葉爲人人竿一燈立睥睨間兵士伏垣內擊鼓叫噪若將  
縋城砍營者獲矢無算

王師攻旣久降將劉良佐與應元雅相善遙語曰宏光已走  
江南無主君早降可保富貴應元曰我一典史耳猶不忘故  
國君爵爲列侯握重兵不能捍衛疆圉乃爲敵前驅何面目  
見我邪李成棟旣破松江率所部十四萬至驅降將吳志葵  
黃蜚至城下陳說利害應元罵曰敗軍之將被擒不速死奚  
喋喋爲應元偉軀幹性嚴毅號令明肅犯者不少貸然輕財  
與中賞輒逾格傷者親爲裹創死則酌酒哭之明遇以寬厚

稱毀家徇義善撫循往往流涕相勞苦士故樂爲之死會中  
秋給軍民賞月錢分曹攜具登城痛飲許用德製樂府五更  
轉曲使善謳者曼聲歌之其聲淒婉北兵聞之皆泣下旣知  
城中無降意攻益急礮聲徹晝夜死傷日積巷哭相聞應元  
慷慨登陴意氣自若八月辛丑大雨如注日中有紅光一縷  
起土橋直射城西城遂陷應元自投於河水淺不死遂被執  
劉良佐持之泣應元曰死耳何泣爲見我貝勒不跪一卒槍  
刺之脛折踣地擁入棲霞禪院夜半寺僧聞大聲呼速斫我  
者再已乃寂明遇搏戰被殺手握刀僵立不仆用德於前數  
日驅妻子盡室焚死訓導金壇馮厚敦自縊於明倫堂妻王  
氏與其孀妹結衽投水死邑人兵部主事沈鼎科崇禎辛未

進士自縊死中書舍人戚勳視妻女子婦投繯舉北面再拜  
舉火自焚死流寓則武進舉人夏維新諸生呂九韶王華皆  
自刎死踰月有歸姜者入城自擲死凡攻守八十一日竟無  
一人降者而

大兵之死者亦七萬五千有奇閩中聞報隆武帝泣曰吾家  
子孫遇江陰三尺童子亦當加敬也城中屍骸枕藉街巷池  
井皆滿薰臭不可近有一女子題詩城牆曰寄語行人休掩  
鼻活人不及死人香我

朝賜應元通諡忠烈明遇勲烈愍厚敦節愍

黃毓祺字介茲江陰貢生乙酉閏六月與弟子徐趨起兵行  
塘與城中相應魯監國授以兵部尙書敕印隆武帝亦遙授

爲浙直軍門得私署官屬江陰破乃亡命淮南與其黨棲山  
中明年冬偵城中無備率王春等十四人來襲不克十四人  
皆死趨被獲毓祺跳而逸僞爲卜者與常熟武舉許彥達遊  
通州主湖蕩橋之薛繼周家凡遊擊參將自海上來雖滿裝  
及入謁則青衣垂手眾疑之將起義遣江陰徐摩致書錢謙  
益提銀五千用巡撫印鈐之謙益知其事必敗卻之持空函  
返摩之友人徽州江純一謂摩返必挾重貲發之可得厚利  
詣營告變毓祺遂與彥達繼周同就江甯獄命其具供奮筆  
書曰道重君親教先忠孝避禪已久豈有宦情義憤激中情  
不容已明主嘉誠遣使授職招賢選士分所應然哀憤曠官  
死有餘辜謹抱印待終附子卿之義獄中賦小遊仙詩自註

之以授門人鄧大臨獄成將刑大臨告之期命取襲衣自斂  
跣足而逝當事戮其屍方徐趨之被獲也毓祺子大湛大紅  
被收發配功臣家鄉人醵金贖之教授弟子學行不愧其父  
大臨字西起常熟人既葬毓祺變服爲黃冠去徐趨江陰諸  
生與王春等十四人襲江陰被獲見縣令劉景綽長揖不跪  
左右叱曰非爾父母官邪何不跪趨厲聲曰此故明降臣何  
父母爲令壯其志擬釋之言吾知子非謀逆者豈有所親在  
獄欲篡取之邪曰我何親在志不忘故國耳令曰若然子必  
死矣曰我固不欲生遂爲此也令曰子誠奇士吾將薦之以  
官趨乃笑曰汝爲明進士位至監司亦不卑矣今降而爲令  
汝且不能自擇而爲我擇官乎令曰吾以吏隱耳曰汝外吏

欲去則去天壤甚寬何致含羞苟活貽青史玷哉令大慚連呼送獄丁亥正月八日殺於市

顧杲字子方無錫人光祿卿憲成從子性豪邁尙氣節酒後與貴池吳應箕掀髯抵掌談天下事輒痛哭哭罷輒狂歌阮大鍼之僑居金陵也思結納後進以延時譽蓄聲伎日置酒高會附風雅者多歸焉禮部主事周鑣惡之倡議草檄以討名曰留都防亂公揭復社列名者百四十餘人而難於爲首者杲曰舍我其誰大鍼銜之次骨及得志將捕諸人興大獄杲猶無所顧忌爲萬言書上於當事巡撫祁彪佳嘉其義保護甚至大鍼嗾徐丞者具劾馬士英擬旨逮問副都御史鄒之麟與杲爲姻連稽其駕帖國亡事得解

王師抵常州知縣林飾遁邑人王如玉顧君起持冊獻降會  
杲起兵應江上遇之砂山命所部執之兩人大呼曰此賊也  
砂山人方團練禦盜倉卒不加辨羣起執杲杲無以自明乃  
曰願誅如玉君起而後死砂山人聽之於是被害旣而審其  
爲杲眾大悔就地立祠以祀焉

王謀無錫人將起義筮之不吉再筮兆益凶怒擲課筒於地  
率鄉兵萬人於丙戌十一月十一日夜薄郡城我知府蕭某  
登城望之見白布抹首曰賊夜至烏合耳開門逆戰擒一人  
斬之擲其首級謀眾固不知兵見首級飛墮遂驚潰謀被獲  
罵不屈久之眾越獄謀獨不去遂見殺又常州諸生張龍文  
者於乙酉閏六月起兵謀復郡城敗死舉人巢之梁嘗知曹

州歸里亦以起兵父子俱死有朱某者失其名烏程朱國楨之孫也辛卯江南已大定某忽起兵南潯有眾數千出沒吳淞泖澱間與我兵轉戰白龍橋北被執語不屈我大帥斷其喉友人某潛抱屍以楮封喉殮之妻某氏一慟而絕既蘇日夜哭竟斷腸死

沈猶龍字雲升華亭人萬厯丙辰進士由知縣徵授御史崇禎間進太僕少卿拜右僉都御史巡撫福建時江西妖賊張普薇作亂猶龍遣遊擊黃斌卿協勦大破之增秩賜金後以招降鄭芝龍威名特著遷兵部右侍郎總督兩廣軍務兼廣東巡撫宏光時召理部事不就明年南京覆列城望風下閩六月吳淞水師提督吳志葵自海入江總兵黃蜚亦擁千艘



由無錫來共結水寨於泖湖適

大清遣安撫官至有常指揮者徧括郡人物郡人殺之共推  
猶龍起兵猶龍乃偕邑紳陳子龍李待問章簡等募壯士數  
千城守與志葵蜚相犄角八月初旬我兵以輕舟截春申浦  
大戰乘風縱火二將皆被執遂圍郡城降紳董廷對將內應  
事覺郡人磔殺之已有假黃蜚兵號者突至猶龍以爲信開  
門納之紅巾抹首者隨之入俄而巾脫皆辮髮也眾人驚呼  
城破矣守卒盡潰猶龍出東門中流矢死於濠同死者教諭  
睦明永丹陽舉人書示其子曰我父命我名修短視明白縊  
於明倫堂邑紳李待問崇禎癸未進士授中書舍人初待問  
夢袍服間有字曰天孫織錦以爲中翰兆也至是遇害於織

染局章簡以舉人官羅源知縣守南門被執不屈死尙寶司  
丞徐念祖與妻張二妾陸與李俱投縊死又有傅凝之者亦  
舉人也參吳志葵軍黃浦之敗與諸生戴泓赴水死衣工陸  
厚元積薪於門語其妻曰能完節乎曰能厚元舉火與其妻  
子女皆焚死我

朝賜猶龍通諡忠烈待問忠節簡念祖節愍

周室瑜崑山舉人營官儀封知縣朱集璜崑山貢生以學行  
爲鄉里所推南都亡邑人方議拒守而縣丞閻茂才已遣使  
投誠眾乃殺茂才以閏六月乙未推前狼山總兵王佐才爲  
盟主參將陳宏勲前知縣楊永言邑諸生歸莊顧炎武嘉定  
諸生吳其沆各自城外率壯士百人來助室瑜集璜與邑諸

生陶城貢生陳大任舉兵應之協守甚力

王師至宏勛率舟師迎戰而敗遊擊孫志尹戰歿城遂陷永  
言等遁去其沆死之佐才縱民出走冠帶坐帥府被殺室瑜  
與子朝鑛妻諸氏朝鑛妻王氏同不屈死集璜投河死城居  
雞鳴塘去城二十里率鄉兵赴援不及還家自經死大任始  
倡義迎佐才以其宅爲帥府與妻張氏子思翰同死同時殉  
難者自集璜門人孫道民張謙外以守禦死者蘇觀道莊萬  
程陸世鏗陸雲將歸之甲周復培陸彥冲以代父死者沈微  
憲朱國軾以救母死者徐沼又有徐激王在中吳行貞皆不  
屈死焉我

朝賜室瑜通諡節愍志尹烈愍佐才另有傳

王湛太倉諸生故相國錫爵之裔也薙髮令下語其兄醕曰  
弟誓與髮爲存亡也集里人陳說大義從者數百人與其友  
蔡仲昭魏虎臣橫刀前驅圍州城官吏登陴笑曰此烏合耳  
何能爲礮擊之眾皆伏地不能傷訝曰此知兵者傳令禁舉  
火以虞內變三日突烟不起人聲寂然眾謂其怯也板扉遮  
矢石薄城呼噪時暑甚自辰至未饑且疲解衣少憩守者驟  
開門以十二騎突馳之遂大潰醕受傷赴水死湛砍一騎未  
及亦被砍死仲昭虎臣俱戰死

侯峒曾字豫瞻太倉嘉定人給事中震陽子也成天啓乙丑  
進士顧秉謙欲招之昇以館選不往謁已授南京兵部主事  
以憂歸崇禎初尙書張鳳翼薦爲職方郎中辭改南京文選

主事轉稽勲郎中江西提學參議時益王勢方熾峒曾於歲試黜二宗生名王怒誚讓不爲動給事中耿始然奉命督賦監司以屬禮見峒曾獨與抗行剛正之譽達京師尋拜浙江參政分守嘉湖漕卒擊傷秀水知縣李向中峒曾請於撫按捕戮首惡部內肅然吏部尙書鄭三俊舉天下賢能監司五人峒曾與焉擢順天府丞未赴而京師陷宏光時起左通政引疾不就南都潰走避鄉舍乙酉六月降將李成棟以水陸兵駐吳淞多剽斂民憤甚闔練鄉兵破成棟舟師於新涇推峒曾主城守事里人黃瀉耀張錫眉等慷慨誓師分門固守一敗成棟於羅店再敗之於倉橋成棟怒大修戰具破婁塘逼太倉自率銳師來攻峒曾乞師於總兵吳志葵志葵遣遊

擊蔡祥以七百人赴援一戰失利外援遂絕或謂大勢已去  
宜爲十萬生靈計峒曾推案痛哭裂招降榜督運磚石七月  
三日大雨城崩一角架巨木支之明日雨溢注城大崩成棟  
薄東門上峒曾與其子元演元潔猶立睥睨間指揮巷戰鄉  
民欲扶之去峒曾曰我旣與城守城亡與亡去何之趨歸拜  
家廟將溺於池叱二子速走避二子痛哭願從死相抱入水  
未絕而兵至引出并殺之有金生者夜竊峒曾首藏篋中家  
人方殮有哭聲自外來者則金生負篋至也我

朝賜通謚曰忠節弟岐曾太學生少時與兄齊名丁亥吳勝  
兆之變陳子龍奔嘉定匿岐曾之僕劉駟家事洩并遇害  
黃醅耀字蘊生幼好學性冲和湛靜喜怒不形於色登崇禎

癸未進士寄弟淵耀書曰吾廷試時鼎甲上殿噴噴稱羨天地間自有爲數千年一人數百年一人者今人不肯爲數千百年之一人而欲爲三年之一人可怪也遂賦詩南歸宏光時不謁選

大兵圍城佐侯峒曾調兵禦守城破與弟淵耀入草巷僧無垢曰君未受職可無死醕耀曰忝名進士宜爲國死今託上人死此清淨土足矣索筆書曰進士黃醕耀死此嗚呼進不能宣力王朝退不能潔身自隱讀書寡益學道無成耿耿不沒此心而已與淵耀分左右就縊年四十一暴屍七晝夜神色不變淵耀諸生律已嚴恪與兄相師友至是偕死我朝賜醕耀通諡曰忠節時同死者邑舉人張錫眉自經死妾

何氏抱女赴水殉之龔用圓與兄諸生用廣自溺死錫眉嘗  
孤館獨坐一女子挑之不爲動用圓以經學知名又馬元調  
夏雲蛟唐全昌三人者皆諸生之有志行與城守死者也又  
有王雲程者亦貢生也又唐景耀唐培朱霞三人亦嘉定諸  
生與李成棟戰於羅店鎮同遇害

金聲字正希其先爲休甯人父客嘉魚因寄籍四歲就傅問  
孔子何人曰聖人問何在曰沒且二千年矣乃哭不食長工  
舉子業多湛深之思名傾海內成崇禎戊辰進士改庶吉士  
明年十一月我

大清兵自大安口入京師戒嚴召對平臺疏薦所知申甫有  
將才申甫者僧也雲南人能製戰車火器命取車器入覽授



申甫都司僉書召對稱旨擢副總兵敕募新軍便宜從事以聲爲御史監其軍召募得數千人皆市井遊手也又爲總理滿桂所忌委之當敵甫不得已結營於蘆溝橋我兵遠出其後御車者惶遽不能轉殲戮殆盡聲旣痛甫之亡也而又恥無功請練兵收桑榆之效不許再疏請罷斥不許請頒詔朝鮮聯絡東江張海外形勢亦不許謝病歸詔屢起之不赴以鄉郡多盜團練義勇爲捍禦十六年鳳督馬士英遣使者李章玉徵貴州兵討賊過徽州大掠吏民以爲賊率眾破走之士英信章玉言謂聲與推官吳翔鳳主使聲兩疏陳辨帝察其無罪置不問是冬起修撰未赴南都立擢左僉都御史堅不起乙酉夏

王師破池州奉太祖高皇帝像率士民拜哭謀起兵門人江  
天一日徽州形勝地諸縣皆阻隘可守獨績溪平迤當孔道  
宜築關隘以重兵據之與他縣爲砥柱遂築叢山關屯軍分  
守六嶺於是甯國邱祖德涇縣尹民興徽州溫璜貴池吳應  
箕多應之隆武帝授聲右都御史兵部右侍郎總督南直軍  
務聲刊布詔書曰使南中知閩地之有主也遂拔旌德甯國  
諸縣

王師攻績溪江天一登陴守禦間出戰殺傷相當己而邱祖  
德尹民興等多敗死降將張天祿以少騎牽制天一於績溪  
問道從新嶺入守嶺者先潰九月二十日徽故御史黃澍詐  
稱援兵聲見其著故衣冠而髮未薙也信之城遂破聲被擒

呼曰微民之守吾使之第執吾去勿傷民揮天一去曰君有  
老母天一不可遂并執至南京諸大僚欽其名館而加禮聲  
呼洪承疇字曰亨九豈有受恩如亨九而甘心降敵者承疇  
咄曰此老火性未除明日驅出通濟門謂刑者曰但絕我氣  
毋斷我頭燃鬚仰而飲刃死僧海明聞聲死市棺抱屍而歎  
呵之不爲動載棺歸蕪湖有閩人蕭倫者賈客也見棺惡泣  
然曰此豈足斂公者吾有善棺值百數十金此我公所安廬  
者也遂易之閩中贈禮部尙書諡文毅我

朝賜通諡曰忠節

江天一字文石世居歙之寒江邨爲文磊落閎肆困童子試  
者二十年間金壇周鍾名徒步往從歸語其友曰周君非佳

士也比爲博士弟子員貧益甚穿見尻有謀脫官事者餽以金百二十不顧而唾受徒淮上淮之婦有殺肝活姑者請旌於守守以其爲別郡生也弗許遂出橐金以己名額其廬適守出鼓樂突前衝其前導守義之置勿問晚年厭舉業奉金聲講學里中聲起義參其軍事守績溪屢戰皆捷聲被執天一歸拜祖母母及家廟曰吾首與金公舉事義不使公獨死也追及之大呼曰我金翰林參軍江天一也遂并執見洪承疇誦思宗諭祭文承疇不能堪揮之出臨刑有與聲耳語者天一呼曰先生千秋在一刻也同見殺閩中贈天一禮部主事我

朝賜通諡曰節愍同時死者自天一外江孟卿陳繼遇吳國

小冊新傳 卷四十六  
積余元英先後被執不屈死者副將羅騰蛟閔士英都司汪以玉諸生項遠洪士魁其可紀者也

邱祖德字念修成都人崇禎丁丑進士授甯國府推官以才調濟南超授按察司僉事分巡東昌招撫土寇多解散十五年冬以兵部尚書張國維薦擢右僉都御史巡撫保定尋代王永吉巡撫山東京師陷闕賊以檄招降祖德斬其使謀發兵拒守而中軍梅應元叛率部卒索印祖德將自刎士民衛之出境道遇魯王同之過淮南都御史沈宸荃劾其輕棄封疆逮訊久之獲釋而成都亦陷無家可歸流寓甯國聞金聲舉兵績溪乃與甯國舉人錢龍文諸生麻三衡沈壽莢等舉兵應之時郡城已失祖德駐師華陽山糾集別部顏苗王一

衡金經萬日吉等十餘部共攻郡城不克壽蕘陣歿祖德還歸山寨七月下旬

王師破山寨獲祖德父子送南京不屈磔死事聞贈太子太師吏部尙書我

朝賜通諡曰忠烈壽蕘都督有容子也

麻三衡宣城人布政使溶之孫生有異相好武事以詩酒自豪與旁近諸生吳太平阮恆阮善長劉鼎甲胡天球馮百家號稱七家軍駐兵稽亭每戰策馬當先舞大刀陷陣人多望而畏之後以眾寡不敵被獲賦絕命詩殺於南京吳太平等七家皆死

尹民興字宣子平陽人崇禎初由進士授甯國知縣調涇縣

有神明稱行取入都爲陳啓新所訐謫福建按察司檢校尋以兵警陳時務十四事授職方主事召對稱旨擢本司郎中周延儒之督師也民興從軍贊畫延儒被譴民興亦下吏除名久之始釋南都立起故官疏言熹廟時崔魏煽逆士大夫喪志忘君幾成苞孽之固遂至先帝末載諸臣或匍伏而拜爵或獻策以梯榮皆忠孝不明之流禍也聲罪討逆司馬職也今抗顏堂上者一逆案之阮大鍼卽行檄四方何以消跋扈將軍之氣古者破格求才惟曰使貪使詐不曰使逆逆案可翻則崔魏亦可卹周鍾諸逆皆可使才宥過矣未幾謝病歸流寓涇縣南都亡與諸生吳漢超趙初浣起兵城守民興善謀漢超善戰

王師攻之頗損傷謂不亞於江陰也城破民興走入閩授兵部郎中行御史事閩亡卒於家

吳漢超宣城諸生強直有膽北都之變與其友湯廷鉉謀募師赴難南都立乃止旣而南都又覆慨然曰天下事遂已乎議保甯國境無應者乃走涇縣與民興初浣起兵城守師潰會當塗人有徐淮者聚眾駐華陽山聞漢超名禮而致之合兵連破句容高淳溧水太平漢超曰我兵少聚而守城則無以攻戰我以遊騎四出使彼疲於策應此伍員報楚之智也以故所克州縣皆不守然是時民心已渙漢超復無以撫定之事愈無成丙戌正月四日襲甯國夜緣南城登同知王家梁勒兵巷戰漢超所部皆甯國人各顧其家莫有鬪志遂潰



訊俘卒始知漢超爲之主於是圖其家令曰不出且族漢超已出城念母在且恐累族人乃歸死臨刑不屈膝剖其腹膽長三寸妻戚氏墜樓死初浣涇縣人城破被殺

吳應箕字次尾貴池人善今古文詞復社領袖也崇禎壬午以鄉試副榜貢入京公卿咸加禮異南都之以防亂揭帖逐阮大鍼也應箕實倡之周鑣下獄應箕入視大鍼急捕之亡命去乙酉秋義兵蠭起有奉宗室朱盛濃爲號者應箕起兵應之題壁曰韓亡子房奮秦帝魯連恥攻池州不克同事者亡去應箕獨募士以計復建德東流都御史金聲承制署爲池州推官監紀軍事聲敗

王師逼應箕眾潰匿婺源祁門界被獲不屈與官兵偕輒踞

上坐眾亦敬其名不加害將戮之市應箕曰此非死所至松  
林曰可矣一卒以刀擬之叱曰吾頭豈汝可斷邪伸頸謂總  
兵黃某曰以此煩公然無去吾冠將以見先朝於地下也其  
就刑處至今血跡猶存所著有樓山堂前後集熹朝忠節錄  
二卷兩朝剝復錄十卷留都見聞錄三卷東林木末六卷續  
觚不觚錄二卷分宜張爾公嘗稱應箕人文似陳同甫時以  
爲知言我

朝賜通諡曰忠節

龐昌胤西充人崇禎丁丑進士知青陽縣國亡棄官隱九華  
山與邑人孫象壯謀起兵事洩被執行至五溪橋旅店夜扃  
戶臥明日呼之則死矣我

朝賜通諡曰節愍

吳源長廣德州太學生舉兵梭子山與民人裴君量合兵攻廣德破之至湖州戰敗被執俱死

謝琢溧陽諸生兵備僉事鼎新子也與副將錢國華同日起兵士卒欲取餉民間琢毀家應之不繼而潰被執命輸資曰我大明諸生豈以貨活哉乃飲刃死國華遙奉宗室瑞昌王者兵敗至對埠見殺又興化諸生張明聖十四人以起兵死司石磐鹽城諸生與都司酈某同領鄉兵被執至淮安見我大吏挺立不跪酈欲脫石磐於死乃曰此儒生吾劫之爲書記者石磐大呼曰吾實首事奈何諱之下獄六十餘日狂歌痛飲酣詈不輟皆見殺我

朝賜鄧某通諡節愍

繆鼎吉鼎言兄弟東場鹽丁也絕有力淮人王翹林等奉新昌王攻克鹽城興化鼎吉鼎言以其徒應之與

王師戰鼎言持長矛掠陣鋒不可當以叢箭死鼎吉復糾眾攻城屢有斬獲衝其營不爲動轉戰不息飢不得食遂被擒我大帥愛其勇欲釋之不屈死新昌王亦被殺於淮南

周損麻城人崇禎癸未進士授饒州推官行取御史

王師入江西損走福建隆武帝授兵部尙書歸家與猶子羽儀練鄉勇戊子己丑之間英霍間義旗雜樹有寨主洞主之號共四十八所損聞宗室石城王之孫統錡立飛旗寨乃率卒數百人馬數十匹歸之傅夢鼎貴州人以選貢官泗州教

論獻禦寇策有功擢鳳陽同知遷安慶知府城破走潛山踞  
皖澗寨傅謙之故潛山典史又有桂蟾者鄱陽諸生嘗從淮  
上起義義堂和尚者故公安貢生偕歸統錡事敗皆死之  
王燭字定安羅田舉人授涓川知縣戊子秋與友人曹脣昌  
起兵破廬州不守轉戰蘄黃間又與霍山侯應龍等合兵攻  
霍山己丑粵中授兵部尙書總督鳳陽義軍庚寅連戰潛山  
太湖間兵敗俘至江甯不屈死

侯應龍霍山人與其友張圖容楊國士等聚眾萬餘人佩義  
勝將軍印與王燭合軍攻霍山不下退取舒城潛山己而自  
劉家園出攻獅子寨及南關拔之營於管家渡又移劄將軍  
寨己丑正月

大兵會剿寨破被執俱伏法於是皖省義師略盡矣

馮宏圖廬州人有謾言史閣部未死者宏圖假其名召眾遠近信之戊子春攻英霍六安皆下大江南北欣然謂閣部尙存也周損傅夢鼎王燭之屬聞風起應未幾宏圖敗歿無爲州吳光仁巢縣葉士章皆以內應誅

李虞夔字一甫平陸人天啓壬戌進士累官右僉都御史巡撫甯夏國變後家居不出戊子冬降將姜瓖以大同叛其黨姚舉等劫殺官軍並運餉道臣王昌齡於平原驛瓖自稱大將軍易明冠服諸在籍鄉官如萬練劉遷王永強輩皆舉兵應瓖練踞偏關復甯武岢嵐保德遷略鴈門關及代州繁峙五臺等縣永強據榆林窺西安虞夔偕子宏乘勢起兵克潼

關及蒲解二州明年瓌旣伏誅練遷永弼先後敗死  
王師至平陸山寨不守宏投崖死虞夔奔陝西匿王某家跡  
得殺之

男承禮編輯

仁和魏錫曾參校  
會稽梁繼元覆校

小腆紀傳卷第四十六終